

von Wulf Wager

Vorsicht Grillhoden!



Frieher war vieles anderscht ond manches besser. Wieder anderes ischt heit viel besser, hot aber au Nochtöile. I ka me no erinnra, wo mr em Wendr mit de Wendrschuah, em Wendrkittel ond mit de Heedscha autogfahra ischt, weil der Käfer zwar a Hoizong ghet hot, aber die bloß em Sommr funktioniert hot.

Heit isch des alles viel oifa-cher. Do hot ma Standhoizonga ond wenn des net, no wenigstens a Sitzhoizong, also a Zwetschgadörre. Weil des brauchat jo bloß zarte Frau.

Gstandene Kerle brauchat des net ond sottat es tun-lichscht lassa, den Oiergrill eizomschalta - zumindescht, wenn se sich no vermehra wellat.

Es hot nämlich en guada Grund, warum dia Oier außerhalb von dem 37 Grad warmä Körper send: Die brauchat a bissle meh Kälte, damit sich die Spermia optimal entwick-la ond auf da Schwimmettkampfrichtung weiblicher Eizelle trainiera kennat. Wenn mr jetzt aber beim Auto-fahra dia Sitzhoizong eischält, no wird dia männliche Fortpflanzongseirichtung richtiggehend gegrillt. Des hot jetzt des britische Fachmagazin "New Scientist" berichtet. Do isch au belegt wordä, dass Paare später schwanger werdat, wenn dr Ma täglich länger als drei Stönd im Auto ondrwegs ischt.

Also, ihr Laschtwagafahrer, Taxifahrer, Baura ond älle, wo so lang ema Fahrzeug sitzat: Lassat wenigstens den Oiergrill aus. Des stoht bloß Väddr zu, dia mindeschtens 50 Johr alt send. Also so Kerle wie mir ...

Bis näggschd Woch'

Ihr